

YOLANDA CROES SALIENDO CU BUKI "PERDI RIBA LAMA"

ORANJESTAD (AAN): Recientemente DIARIO a tene un entrevista cu Yolanda Croes, e escritor local cu a bira grandemente conoci pa su prome buki y bestseller "Acompaña Pa Un Angel: E tragedia di Buelo 2000".

Yolanda Croes awor ta cla pa saca riba mercado su di segundo buki titula "Perdi Riba Lama". El a splica cu e buki ta un compilacion di tres storia, cada uno di un piscador Arubiano cu a haya nan ta perdi riba laman y e odisea cu nan a pasa aden pa worde rescata.

Yolanda Croes ta rindi homenahe na nos piscadonan di antes y di awor relatando nan momentonan di angustia, pero tambe ilustrando nan curashi enorme y confianza firme cu nan lo worde rescata. Segun e autor, cada storia ta un les di bida pa enrikese nos conocimiento y siña di dje.

E prome storia ta di año 1950 y loke a pasa cu Buchi "Panama" Wever. E ta un persona awendia bon conoci y cu ta haci hopi pa mundo di deporte, incluyendo e hecho cu danki na su vision el a lanta Lifida. Buchi Panama ta relata di su experiencia como

un persona hoben y cabez loco, cu nan a subi laman pa bay pisca. Trinta dia sin awa y sin cuminda den un boto perdi sin rumbo, rondona pa un lama furioso cu olanan brabo y cu solamente e solo den cielo manera un bola di candela como compañante, te cu uno di nan a fayece, y e resto a sobrevivir y yega Panama, unda a ricibi nan mas morto cu bibo.

Segundo storia ta basa riba bida di tata di Yolanda, cu tabata piscador. E storia di Buchi Everaldo a traha 40 año pa WEB, pero piscamento tabata su hobby, y un dia el a subi laman y no a bin mas. E tabatin 85 año di edad. Den e storia aki ta relata mas di e bario di Pos Chikito, y con e muchanan a lanta. Su piscamento ta forma parti di e bida diario di su famia y e ta pone su porta di cas riba un screef di moda cu e lector por tira un bista paden y sera conoci cu e famia Arubiano den un bario chikito, drumi den scochi lama den añanan 50 y 60. For di Buchi su mochila bieu ta sali storiantan conmovedor y chistoso y e autor ta mira bek riba su infancia cu un nota humorístico

y un chispa di nostalgia. Dia cu Buchi a perde riba lama, un presentimento straño di un di su yiu hombernan, a cambia rumbo di un destino fatal.

Di tercer storia ta encuanto di e caso recién di tres miembro di famia Geerman y famia Fingal, kendenan a perde na luna di Mei cu a pasa, ora nan a bay pisca, y segun nan fiel creencia tabata nan cinco dia cu nan boto a bolter den e lama feroz riba cabez di Aruba. Esun di cinco a compaña nan y a pone Angelnan Guardian bou nan pia den e anochi scur y tenebroso, ora nan tabata lucha pa nan bida den awanan di tribon. Danki Dios cu un tanquero a yuda nan, y trece nan pa tera firme.

Segun Yolanda, e prome storia a haya e titulo "Buchi Panama". E segundo storia ta "E Muchila di Buchi". Esun tercer ta "E Rescate Milagroso".

Ademas di esaki, Yolanda a splica cu e ta dedica e buki aki na su tata, cu tin Parkinson's Disease y cu ta den rolstul, sinembargo semper a keda un bon tata. Ademas di esey, e publicacion di buki lo bay beneficia e organizacion local di Search & Rescue, den



cual ruman homber di Yolanda, esta Ruben Croes, ta activamente involvi. E organizacion aki ta cumpliendo cinco año, y ganashi di e buki ta bay pa Search & Rescue.

E buki "Perdi Riba Lama" lo sali na fin di October, y lo subi mercado cu 10.000 ehemplar. Ta pensa tambe di sake den otro idioma, y posiblemente mande Hulanda.

E ta kere cu pueblo lo gusta

e buki, pasobra ta historia di berdad e ta!

Den su obra Yolanda ta presenta dos poesia di su mama, sra. Avelina Croes, cu a skirbi nan especialmente pa e Festival di Arte di Search & Rescue Foundation Aruba. Tambe e buki ta ilustra cu algun potret. E portada y foto di e autor ta di e fotografo Paul van Driel y e buki ta imprimi pa Vad Printers